

卷二

金匱要畧
戶



張仲景金匱要畧論註卷三

構李徐

彬忠可甫著

門人吳景彰晉生父較

百合狐惑陰陽毒病脉證并治第三

論一首 證三條

方十二首

論曰百合病者百脉一宗悉致其病也意欲食復不能食嘗默默欲卧不能卧欲行不能行飲食或有美時或有不欲聞食臭時如寒無寒如熱無熱口苦小便赤諸藥不能治得藥則劇吐利如有神靈者身形



如和其脉微數。每溺時頭痛者六十日乃愈。若溺時頭不痛。淅淅然者四十日愈。若溺時快然。但頭眩者二十日愈。其證或未病而預見。或病四五日而出。或病二十日。或一月後見者。各隨證治之。

註曰。此言傷寒虛勞之人。都有正氣不能禦邪。致浸淫經脉。現證雜亂。不能復分經絡。曰百合病。謂周身百脉皆病。然若有所宗。而主之以致各病。而各不能專持其病者。但覺行住坐卧飲食皆妨。而寒熱口苦。便赤吐利。襍出。且得藥則劇。身形反如。

和毫無可捉摸而唯其脉微數似有病邪餘熱
轉爲患現證不能食默默不能卧似屬陽明寒熱
口苦似屬少陽小便赤似屬太陽吐利似屬三焦
腑病未深入臟故恐邪久留連陽經搏結於腦則
猝難脫身而非不治之病但於溺時而頭痛者知
其深曰六十日愈謂月再週而陰勝則陽邪自平
也頭不痛而漸漸然則病稍淺矣快然而頭眩則
邪更淺矣故愈日以漸而速也至其病發之先後
遠近無非視內氣片邪蓄之淺深故曰各隨證治

之乃千金曰其狀惡寒而嘔者病在上焦也。二十三日當愈。其狀腹滿微喘大便堅三四日一大便。時復小溇者病在中焦也。六十二日當愈。其狀小便淋瀝而難者病在下焦也。三十三日當愈。各隨證治之。則知此病有搏邪在內而微有三焦之分者。其治法又當分三焦而和之可知矣。

百合病發汗後者百合知母湯主之。○百合病下之後者滑石代赭湯主之。

註曰十二經絡皆朝宗于肺而氣口成寸。乃仲景

肺爲華蓋
五臟之長
且主週身
之氣故宜
主此爲治

註百合病云百脉一宗悉致其病豈非謂百脉之
病無可名狀一宗于肺而爲病乎百合者味甘平
微苦色白陽中之陰補肺藥也觀其用之爲主而
卽以百合名病則仲景因肺爲治之意不更曉然
乎然不明言肺何也蓋百合病乃傷寒餘邪留連
陽經而浸淫於各腑之陰無正氣以統之各自爲
病互相牽引若出一宗而現證無一是肺則知病
雖不在肺而肺之治卽實不行矣故以百合之夜
合屬陰色白歸肺瓣瓣相附無往不合者補肺之

正氣以合於他臟而理其滯者爲主其在汗後者
汗過傷陽陽虛熱鬱不可攻補故以百合同知母
之保肺清胃而滋腎者以養其陰加之泉水以清
其熱而陽邪自化也其在下後者下多傷陰虛邪
在陰陰虛火逆攻補無益故以百合同滑石之走
竅代赭之鎮逆者以通陽氣加之泉水以瀉陰火
而陰氣自調也

百合知母湯方

百合 七枚

知母 三兩

右先以水洗百合漬一宿當白沫出去其水更以
泉水二升煎取一升去滓別以泉水二升煎知母
取一升後合煎取一升五合分溫再服

滑石代赭湯方

百合

七枚

滑石

三兩碎
綿裹

代赭石

如彈丸大
碎綿裹

右先以水洗百合浸一宿當白沫出去其水更以
泉水二升煎取一升別以泉水二升煎滑石代赭
取一升後合和重煎分溫服
百合病吐之後者百合雞子湯主之

註曰吐傷元氣而陰精不上奉故百合病在吐後者須以雞子黃之養陰者同泉水以滋元陰協百合以行肺氣則氣血調而陰陽自平。

百合雞子湯方

百合 七枚

雞子黃 一枚

右先以水洗百合浸一宿當白沫出去其水更以泉水二升煎取一升去滓內雞子黃覺勻煎五分溫服

百合病不經吐下發汗病形如初者百合地黃湯主之



註曰既不經吐下發汗則無傷陰傷陽之可慮但病形如初初者卽傷寒論所謂太陽病是也如利不解是陽經之困極而陰氣亦耗竭矣心爲五臟之主故以生地之涼血補心者同百合泉水養陰以化其陽經之久邪。

百合地黃湯方

百合

七枚

生地黃汁

一升

右以水洗百合漬一宿當白沫出去其水更以泉水二升煎取一升去滓內地黃汁煎取一升五合

分溫再服中病勿更服大便當如漆

百合病一月不解變成渴者百合洗方主之

註曰渴有陽渴有陰渴若百合病一月不解而變

成渴其爲陰虛火熾無疑矣陰虛而邪氣蔓延陽

不隨之而病乎故以百合洗其皮毛使皮毛陽分

得其平而通氣于陰卽是肺朝百脉輸精皮毛使

毛脉合精行氣于腑之理食煑餅假麥氣以養心

液也勿食鹽豉恐傷陰血也

右以百合一升以水一斗漬之一宿以洗身洗已



食煮餅勿以鹽豉也

百合病。渴不差者。括萋牡蠣散主之。

註曰。渴不差。是雖百合湯洗而無益矣。明是內之陰氣未復。陰氣未復。由于陽亢也。故以括萋根清胸中之熱。牡蠣清下焦之熱。與上平陽以救陰同法。但此從其內治耳。故不用百合而作散。

括萋牡蠣散方

括萋根

牡蠣

熬等分

右爲細末。飲服方寸匕。日三服。



百合病變發熱者百合滑石散主之

註曰仲景嘗謂發于陽部其人振寒而發熱則知變發熱者內熱不已淫于肌膚而陽分亦熱故以滑石清腹中之熱以和其內而平其外兼百合狀肺氣以調之不用泉水熱已在外不欲過寒傷陰故曰當微利謂畧疏其氣而陰平熱則除也

百合滑石散方

百合

一兩

滑石

二兩

右爲散飲服方寸七日三服當微利者止服熱則



除

百合病見于陰者以陽法救之見于陽者以陰法救之見陽攻陰復發其汗此爲逆見陰攻陽乃復下之此亦爲逆

或問見陰見陽必
有病情可
見而即以
汗吐下爲
見陰見陽
之分何所
據乎曰百
合病雖所
因或不等

註曰此段總結全篇謂百合病同是內氣與傷寒餘邪相併留連無已不患增益而患因循故病在下後及變渴渴不止所謂見於陰也勢必及陽至陽亦病而無可爲矣故以滑石通徹其毛竅之陽百合利其皮毛之陽在內之陽燥括萎牡蠣養其



所發有先後脈證書同陰陽無致而渴熱亦屬偶有不皆然也故不若即原因而推之耳

腹內之陽陽得其平陰邪欲傳之而不受則陰中之邪漸消矣所謂以陽法救之也病在汗後及吐後及病形如初及變發熱皆所謂見于陽也勢必及陰至陰亦病而無可爲矣故以知母固其肺胃之陰雞子養其血分之陰生地壯其心中之陰熱發於肌表者滑石以和其腸胃之陰陰得所養陽邪欲傳之而不受則陽中之邪漸消矣所謂以陰法救之也然而救也非攻也若用汗下之法則是攻矣故見陽攻陰陰虛陽將襲之而况云救乎然

使陽卽有欲襲之勢非陽之強也故曰復發其汗
此爲逆謂初誤在攻陰此又誤在治陽也見陰攻
陽陽虛陰將襲之而况云救乎然使陰卽有欲襲
之勢非陰之強也故曰乃復下之此亦爲逆謂初
誤在攻陽此又誤在治陰也

論曰陽法陰法卽和陰和陽之法也以此相救卽
和其未病意內經所謂用陰和陽用陽和陰也故
諸治法皆以百合補肺而使流氣于腑所謂氣歸
于權衡權衡以平也皆以泉水清邪熱而使受成

于肺金所謂炎蒸得清肅而萬物容平也但病見陽加一二味以和其陰病見陰加一二味以和其陽耳或曰滑石亦屬陰品以爲和陽藥何也曰氣屬陽竅通陽小便利則氣化滑石色白味淡陰中陽藥也能利竅通便則氣暢氣暢而陽自和也或曰然則滑石旣以和陽逮後變發熱又以之和陰何也曰百合病至發熱此又陰病不已而陽乃併病與陽獨病不同故外旣熱且安其內而以滑石之涼寒潤下者主之然卽不敢與泉水並用以大